

19 JUL 1999

Tembakau-bantuan

PM AKAN SAMPAIKAN SUMBANGAN KEPADA PENANAM TEMBAKAU

KOTA BAHARU, 19 Julai (Bernama) -- Perdana Menteri Datuk Seri Dr Mahathir Mohamad akan menyampaikan sumbangan berjumlah RM649,725 kepada para penanam tembakau di negeri ini yang mengalami kerugian ekoran kemusnahan tanaman akibat hujan lebat sepanjang musim lepas.

Pegawai Perhubungan Awam, Lembaga Tembakau Negara (LTN), Ahmad Nordin Tahir berkata majlis penyerahan itu dibuat sempena lawatan Dr Mahathir ke Kelantan, Khamis ini.

"Seramai 8,675 orang penanam tembakau di Kelantan terlibat akibat bencana itu, yang melibatkan kawasan seluas 3,412 hektar," katanya dalam kenyataan yang dikeluarkan di sini, hari ini.

Menurutnya bagi musim 1998/1999, yang penanaman bermula Oktober lepas kesemua penanam terbabat kerugian apabila hujan lebat memusnahkan tanaman mereka di beberapa jajahan di negeri ini.

Katanya antara jajahan yang banyak terjejas ialah Bachok seluas 2,664 hektar, Pasir Puteh (730 hektar) dan Pasir Mas (17 hektar) dengan jumlah kerugian keseluruhan sebanyak RM6,204,178.

Ahmad Nordin berkata sumbangan ihsan itu dikeluarkan melalui Tabung Kebajikan Industri Tambakau yang ditubuhkan oleh LTN bagi membantu pengusaha yang tanaman mereka rosak atau musnah disebabkan bencana alam.

Menurutnya, tahun lepas Lembaga Jemaah Tembakau Negara telah meluluskan bantuan sebanyak RM205,241 melalui tabung yang sama bagi membantu seramai 2,152 orang penanam tembakau di seluruh negara yang mengalami kerosakan tanaman akibat fenomena Al-Nino.

Menurutnya hasil punggutan daun tembakau bagi musim 1998/1999 di Kelantan merosot teruk ekoran daripada bencana alam.

Pada musim 1997/1998 sebanyak RM33.66 juta hasil daun tembakau hijau telah dipungut di Kelantan melibatkan 42.97 juta kilogram tembakau, tetapi bagi musim yang baru ini hanya 20.40 juta kilogram daun hijau bernilai RM16.12 juta dapat dihasilkan, katanya.

-- BERNAMA

MNR RI